

Ekap kânok Peteronâ kulemguip.

Mâsop den.

1 ¹Petero, nâ Yesu Kristo zâkkât Aposolo ândiannâ Anutuñâ a diizingip, Ponto, Galata, Kapadosia, Asia sot Bitinia hânân osetboret ândie, zengât ekap zi kulemguan. ²Anutu Ibânâ nângi zeipkât gâsum sâlâpzingoip, zen Kaapumñâ um hâlâlu kwatzingâbap sot Yesu Kristogât dinâ lunetâ zâknâ zengât op moipkât um salek kwatzingâbapkât diizingip. Zengâren um lumbenâ sot tânzângoizângoij patâ op sambâlem zimbap.

Sumbemân kut ñai âlip zorat sâtâre utnat.

³Nen Anutu, Kembuniñâ Yesu Kristo zâkkât Ibâ, zâk sâm âlip kwâkñangânat. Zâknâ Yesu Kristo mumujan gâbâ mânggeipkât tânnângom um bâbâlañ op ândiândi bonñangât nângâm nângâm ândinatkat mânginingip. ⁴Oi sumbemân nengât singi kut ñai zinzij kâtik, buñ orot buñâ, zo pâi nengât mambâtningâm ziap. Zo minatkat yatâ otningip. ⁵Anutu zâk imbanâñootñâ galem otningi nângâm pâlâtâñ kwâkñangâm ândeindâ gâtâm narâk âki kubikkubikkât bonñâ muyagibap.

⁶Zen zorat sâtâre op ândie. Narâk pânkânok ziren Anutuñâ sâi sâknam sot kâbâ yâmbât top top sot umbâlâ kwâkñan ândine zorânâ mâsikâzingâbap. ⁷Zorat den ñai sâbâ. Goide kât zo yenñâ, kârâbân pane sei topñâ muyagime. Zengâren yatik topziñ âsagibapkât sâknam sot kâbâ yâmbât âsagezingâmap. Nângâm pâlâtâñziñ bonñâ mo buñâ, zorat topñâ muyagibapkât âsagime. Zen nângâm pâlâtâñziñ zo bonñâ, zorat sâknam kwâkñan ândine Yesu Kristo gâbabân zengât sâtâre sot sâm âlip zo muyagibap. ⁸Zen Yesugât holi tobat mân igâweñâ umziñ zâkkâren kinmap. Oi narâk ziren sinziñâ mân igâweñâ nângâm pâlâtâñ kwâkñangâm ândie. Oi zorat sâtâre patâ, zo añâ mân nângânânggâñ, zo nângânangâme. ⁹Nângâm pâlâtâñziñangât bonñâ, um dâpziñ sumbemân zâizâiñ, zorat mâte otzingapkât sâtâre ue.

Propete zen den kânjan sâwe, zo bon muyageip.

¹⁰Propete ziŋ Anutugâren gâbâ tânzângezângeonâ zi dap dap muyagibap sâm zorat topnâ mâsikâm ândim gawe. Oi a narâk ziren ândien, nenġâren tânzângezângeon zo muyagibapkât den kânjan sâwe. ¹¹Propete ziŋ itâ sâwe, “A bâlijan gâbâ mâkâningâbapkât sâsân, Kristo, zâk âsagem sâknam nânġâmñâ ko neule âsâkñan zâi mem ândibap.” Kaapumñâ den zo umziŋan pâi zen narâk ikâ zoren mo dap yatin Kristo zo yatâ muyagibap sâm, nânġâm ândim gawe. ¹²Oi den sâwe, zorat bonñâ ziŋan buñâ, nenġâren muyagibapkât sâsân, zo sâm muyagiwe. Oi narâk ziren den zorat bonñâ muyageip. Anutuñâ Tirik Kaapumñâ sâŋgongui sumbemân gâbâ gem Kembugât siŋgi a mam otziŋgi siŋgi âlip dâzângeowe. Siŋgi âlip zo den bonñâ. Oi sumbem a ziñâ den zorat topnâ iknatkât nânġâm ândiwe.

Ândiândi sâŋgiñâ zo kândâtkubi.

¹³Zorat zen um nânġânânġâziŋ kubik um kendon ândibi. Oi Yesu Kristoñâ muyagemñâ tânzângeobap, zorat nânġâm nânġâm um bâbâlaŋ op mambât ândibi. ¹⁴Ândiândi sâŋgiñâ sot laŋ gulip ândiândiŋ mem ândiwe, zo narâk ziren mân mem ândibi. Buñâ. Anutugât diñâ lum ândibi. ¹⁵Um hâlâlû mariñandâ diiziŋgipkât zen zâk yatâ târârak op ândibi. ¹⁶Kembugât den nâi itâ kulemgune ziap, “Nâ târârak ândiangât zen târâragâk ândibi.”

Yesu Kristogât gilâmñandâ sâŋgâniŋ meip.

¹⁷Zen Ibâniŋ sâm mâpâsime, Anutu zâk hâtubâtu mân opmap. Ândiândiniñangât tobatniñâ nânġâm dinniŋ sâm kwâkâbap. Zorat zen kwande ândim hurat kwâkñangâm ândibi. ¹⁸Zen itâ âlip nânġâme. Nen sâkurâpniñâ zengât mâtâp lâŋ ândeindâ kut nâi yenñâ, goide kât yatâ, zorân mân sâŋgâniŋ meip. Buñâ. ¹⁹Kristogât gilâmñandâ sâŋgâniŋ meip. Zâk râma gwamñâ sâknâ âlipñâ zo yatâ op ândeip. ²⁰Anutu zâk mârûmñan hân kombânñâ mân muyageibân nep zo nanñâ sâm pindip. Nânñangât muyamuyagiŋ ko bet narâk murukñan zi nenġât op muyageip. ²¹Zâkñâ nen Anutugâren târokwatniŋgip. Anutuñâ mumuñan gâbâ mânġim neule âsakñâ ġiŋaŋgi ġiarip. Zorat nen Anutu nânġâm pâlatân kwâkñangâm ândien.

Den siŋgi âlipñandâ mânġiniŋgip.

²²Zen den bonñâ lunetâ um dâpziŋ salekkoip. Oi buku bonñâ upigât yatâ muyageip. Zorat umñâ gâsâyagom ândibi. Umziŋ nep zoren pane buku orot âsagem kâtigibap. ²³Zen âsaâsagiŋ uñakñâ. Buñ orotñan buñâ, mân buñ orotñâ. Anutugât den ândiândiŋ sot zinzziŋ kâtik, zobâ muyagiwe. ²⁴Zorat Kembugât ekabân den nâi itâ ziap,

“A zen hibuk yatâ. Oi neuleziņ zo hibuk neule bâloņâ yatâ. Hibuk neule zo âmbârâņgâm gemap. ²⁵Anutugât den ko zo zinzij kâtik. Zo zem zâimâmbap.”
Siņgi âlip den dâzâņgowe, zo ko zi.

Nen Yesugâren pâlâtâņ op kâtiginat.

2 ¹Zen bâliņâ sot sarâ sot kâsâp, umân pâpan, mem ge kwâkwat den zo birâm naņgâbi. ²Birâmņâ katep mâik namgât otziņgâmap, zo yatik zen um dâpziņaņgât nalem, Anutugât den, zorat yatik otziņgâbap. Zo nemņâ siņgi âlibân lâmbat kâtigem kinbi. ³Kembugât ekabân den ñâi itâ ziap,

“Kembuņâ tânzâņgoi naņgâm âkņâle urâwe, zorat op zâkkât den naņgâmņâ lunam upi.

⁴Kembuniņâ Yesugât den ñâi itâ ziap. Zâk mirâ kunkunņâ ândiândiņ. Aņâ ek birâne Anutuņâ zâkkât naņgi zari mem sâlâpkoip. ⁵Zorat zen hâmba ândiândiņ op zâkkâren târokwap kin zâimņâ Kaapumgât namâ upi. Oi Kembugât tirik namâ galem a yatâ umziņâ Kembugâren pane zeï kore okņaņgâbi. Zo Yesu Kristogât op naņgi âlip upap. ⁶Kembugât ekabân den ñâi itâ ziap,

“Naņgâ. Nâ Sioņ bâkņan, Yerusalem kamânân kunkun ñâi kwânâņgan. Kunkun zo gâsum sâlâpkuwan, zo sâņgân patâ. Aņâ zâkkâren naņgâm pâlâtâņ kwapi zo ko mân kwakpi.”

⁷Oi zen zâk naņgâm pâlâtâņ kwâkņaņgâm ândime. Zen zâkkât naņgâne bonņâ uap. Ka a nâmbutņâ naņgâm pâlâtâņziņ buņâ, zengât itâ sâip,

“Mirâ tuutuui a kunkun ek âkon op birâwe, zorâņ kunkun zinzij kâtik op kinzap.”

⁸Kembugât ekabân den ñâi itâ ziap,

“A zen kunkun zoren kom tâmbetagobi.”

A siņgi âlip birâmņâ zoren kumbigât sâsâņ zo, zen yatâ upme.

Nen Anutugât kâmut urâwen.

⁹Zen ko Anutugât kâmut gakâņâ sot tirik namâ galem a gakâņâ sot târârak a ambârâpņâ. Yatâ zo zen ko ñâtâtigân gâbâ diiziņgâm ga âsakņan zâmbarip. Kut ñâi ñâi âlipņâ opmap, zorat siņgi den sâne laņ kârâbapkât gâsuziņgip. ¹⁰Zen mârumņan zâkkât a mân urâwe. Narâk ziren ko Anutugât a kâmut ândie. Mârumņan kwakmak ândiwe. Zi ko tânzâņgoi ândie.

Bâliņâ kândâtkom ândinat.

¹¹Bukurâpnâ, nâ dâzâņgua naņgâne. Zen hânân kwande sot lomba ândimenâ um sâkziņaņgât âkņâle bâliņâ zo kândâtkubi. ¹²Wangât, um

sâkziŋaŋgât âkŋâle bâliŋâ zo um dâpziŋaŋgât kâsa yatâ uap, zorat. Yatâ ândimŋâ um kâtik osetziŋan târâarak ândibi. Yatâ ândine um kâtik a ziŋâ zengât laŋ bâliŋ mâme sâmŋâ topziŋ ek nâŋgâmŋâ Anutuŋâ takâbabân orot mâme nepziŋaŋgât Anutu sâm âlip kwâkŋaŋgâbi.

A kutâ zengât den lunat.

¹³⁻¹⁴ Kembangât op a kutâ sot a sâtŋâ top top zengât sâtziŋ lubi. A kutâ patâ ândiap, zâkkât sot hângât galem a zâambarip, zengât den kâtik ârândâŋ lubi. Ziŋâ bâliŋ mâme a hâuŋâ ziŋgâbigât sot a âlipŋâ ândie, zen sâm âlip kwatziŋgâbigât sâm ziŋgip. ¹⁵ Zen ko nep âlip zi tuumŋâ a um kâtik sâm gulip muyagime, zengât den mem gei pambigât Anutuŋâ sâm ziŋgap. ¹⁶ Zen olaŋziŋgipkât dumun buŋ ândie. Oi ândiândi zorâŋâ bâliŋâ mân ekap kubap. ¹⁷ Târâarak ândim Anutu kore okŋaŋgâbi. ¹⁸ Zen a aksik zengât nâŋgâne gigiŋâ mân upap. Bukurâpziŋ umziŋandâ gasâzâŋgoi ândibi. Anutu hurat kwâkŋaŋgâm ândibi. A kutâ patâgât sât lum ândibi.

Kore a, zengât den.

¹⁹ Kore a, zen patârâpziŋ hurat kwatziŋgâm sâtziŋ lum ândibi. A patâ âlipŋâ sot sânduk ândiândiŋ, zenâk buŋâ. Kârâpŋâ ândiândiŋ, zen ârândâŋ sâtziŋ lum ândibi. ²⁰ Zen Kembangât nâŋgâm âlip utnetâ laŋ sâknam ziŋgâne âkon den mân sâm ândine ko Anutuŋâ zengât nâŋgi âlip upap. ²¹ Ka zen tosa muyagine lapitziŋgâne Anutuŋâ dap yatâ nâŋgi âlip ŋâi upap? Zen târâarak ândim kâmbam ziŋgi hâuŋaŋgât den mân sâm ândine Anutuŋâ zengât nâŋgi âlipŋâ upap.

Yesugât mâtâbân lâŋ âinat.

²² Zen yatâ upigât sâm ziŋgip. Wangât, Kristo zâk yatik zengât op sâknam nâŋgâm kândom otziŋgip. Oi zen mâtâp zo ekŋâ yatik lâŋ âibi. ²³ Yesu zâk bâliŋâ mân oip. Sarâ lâuŋan gâbâ mân gâip. ²⁴ Zâk sâm bâliŋ kwâkŋaŋgâne hâuŋâ mân sâip. Sâknam pindâne hâuŋaŋgât den mân dâzâŋgoip. Buŋâ. Den sâm kwâkâkwâkâŋ nep bonŋâ tuumap, Anutu, zâkkâren nâŋgâm pâlâtâŋ kwâkŋaŋgâm ândeip. ²⁵ Nengât bâliŋandâ zâkkât sâkŋâ kwâkŋan zari poru nagân mem zâi moip. Nen bâliŋâ birâm ândiândi târâarak ândinatkat yatâ oip. Zâkkât useŋâ zorâŋ zengât use zo gulipkoi sopei âlipziŋ urâwe. Zen râma yatâ laŋ gulip ândiwe. Narâk zi ko um dâpziŋaŋgât galem a, Yesu, zâkŋâ diiziŋgi zâkkâren ga ândie.

A ambân zengât den.

3 ¹⁻² Ambân zengât yatik sâbâ. Zen abârâpziŋ zengât gigiŋâ ândibi. Oi abârâpziŋ nâmbutŋâ zen Kembangât den kom ândine zen den mân dâzâŋgomŋâ diim gem ândine abârâpziŋ zengât orot mâme âlip zo ekŋâ umziŋ melâŋbi. ³ Ambân zen sâkkât neule kâukziŋ mem kubik kwâlak

sângân zâizâin gânduziyan pame sot hâmbâ neule âlip mem ândime, zorat nângâne yenṅâ upap. ⁴Neule bonṅâ zo itâ. Umziyan tik zem muyagemap, zo neule zinzin kâtik muyagei Anutuṅâ nângi zâizâin upap. Um lumbe sot um sânduk ândiândin, zorat san. ⁵Kembugât siṅgi ambân mârumṅan ândiwe, zen neule zo mem ândiwe. Oi Anutugâren nângâm pâlâtân kwâkṅanṅâm ândim abârâpzin sâtzin lumarâwe. ⁶Seraṅâ Abaramgât den zo lum ândeip. Oi patânâ sâm ândeip. Oi zen kut ṅâi ṅâi âlipṅâ opṅâ keṅgât buṅ ândim Seragât bârarâp op ândibi.

⁷A zeṅgât yatik sâbâ. Ambân zen imbanṅâzin giginâ. Zorat op ambirâpzin zen nângâmṅik kut zo otziṅgâm ândibi. Oi ândiândi kâtikât ârândân ândibigât sâip. Zorât a zin ambirâpzin gâlem otziṅgâm ândibi. Yatâ op ândine ninâuziṅâ pâṅsâsân buṅ, hâlâluyâk zâibap.

⁸Oi mâpot sâbâ. Zen aksik patâ umzin diim gei um kânok op um sândugân ândibi. A torenṅâ, zeṅgât bukurâpniṅâ sâm umziyandâ gâsâyagom lumbeṅâ op um nângânângâyân ândibi. ⁹A zin kut ṅâi bâliṅâ otziṅgâne hâuṅâ bâliṅik mân otziṅgâbi. A zin sâm bâliṅ kwatziṅgânetâ hâuṅâ sâm bâliṅ den mân dâzâṅgobi. Buṅâ. Zen sâm âlip kwatziṅgâbi. Anutuṅâ mâsop minziṅgâbam diiziṅgiṅkât a mâsop minziṅgâbi.

¹⁰Zorat Kembugât ekabân den ṅâi itâ zaip,

“ṅâi zâk ândiândigât âkṅâlemap sot narâk âlip muyagibapṅâ nângâm, zâk lâuṅâ galem oi den bâliṅâ mân takâbap. Oi lâuṅan gâbâ sarâ den mân gâbap. ¹¹Bâliṅ top top zo kândâtkom kut ṅâi ṅâi âlipṅik upap. Oi lumbeṅâ mâtâp kârum muyagem nepṅâ tuubap. ¹²Kembuṅâ a târârak zen ziṅgiri âlip opmap. Konsâm mâpâsime, zorat kindapkwap tâpmap. Bâliṅ mâme zen ko Kembuṅâ ziṅgitṅâ kâsa otziṅgâm ândimap.”

Sâknamgât den.

¹³Zen ko kut ṅâi âlipṅanṅât nângâm nep tuum kâtigem ândine aṅâ dap dabân tâmbetzâṅgobi? ¹⁴Bâliṅ mâme a nâmbutṅâ zin kâsa otziṅgâne sânam kwâtkwât mân upi. Orot mâme âlipṅanṅât sâknam kwâkṅan zâibi zo ko Anutuṅâ zeṅgât nângi âlip upap. Kâmbam zâṅgonam utne sânamzin mân sâmbubap. Keṅgât mân upi. ¹⁵Umzin mem kubikne Kristoṅâ ko kembuzin ândibap. Oi nângânângâziyandâ Kembugâren nângâm ândime, zorat mâsikâziṅgâne um bâbâlan op topṅâ sapsubi. ¹⁶Oi den zo mulunângen sâmṅâ umziyan bâliṅâ ṅâi mân muyagei sâbi. Huruṅângen sâne âlip upap. Yatâ utne Kristo sot pâlâtân op ândim kut ṅâi ṅâi upme, zorat sâm bâliṅ kwatziṅgâme, a zo zen sarâziṅṅât top muyagei ek aṅun upi. ¹⁷Kristogât siṅgi a zen kut ṅâi ṅâi âlip op ândine Anutuṅâ nângi âlip oi kâmbam sot tâk namin zâmbanbi, zorat nânga âlip uap. Ka bâliṅ utne sâknam ziṅgâbi, a zo zeṅgât nânga giap.

¹⁸Kristo zâk târârak op ândimṅâ a nâmbutṅâ zeṅgât bâliṅâziṅṅât opṅâ sâp kânok moi âkip. Târârakṅandâ gâṅgoṅâ neṅgât op yatâ oip. Nen

Anutugâren nâmbanbapkât sâk sot ândeip, zo kune moip. Ka Kaapum sot ândei ko mângei zaarip.

Noa ândei ândiwe, zengât den.

¹⁹Yesuņa Kaapum sot ândimņâ um dâpziņ tâk namin zeip, zengâren âim siņgi âlip dâzângoip. ²⁰Zen mârumņan Noa zâk waņgâ tuum ândei Anutuņa um lumbeņâ otziņgâm, a zo, zen diņâ lubigât mambâtziņgâm ândei diņâ birâwe. Oi a ambân bituktâ, nâmburân karâmbut yatâ, zeņak waņgâyân zâine tooņâ mân gwâkâziņgi ândiwe. ²¹Too uurup taki Noa sot a ambân gakâņâ waņgâyân zâim hâlâlu ândiwe. Oi too uurup patâ zorat dâpņâ tooņâ too saņgonziņgâme yatâ. Too zo sâkziņan gwapgwap zo mân saņgobapkât upmen. Buņâ. Yesuņa mumuņan gâbâ zaripkât opņâ zen Anutu mâteņan hâlâlu sot tosaņâ buņ kinbigât too saņgonziņgâmen. ²²Yesu zâk sumbemân Anutugât âsan bongen zâi ândiap. Zoren ândei sumbem a zâizâiņ sot imbaņâziņoot aksik patâ zen zâkkât giginâ ândie.

Yesuņa sâknam nâņgip, yatik nâņgâmņâ bâliņâ birânat.

4 ¹Kristo zâk sâknam nâņgip. Zen zo yatik upigât Kristogât nâņgânâņgâ yatâ upi. Oi itâ nâņgâbi, “Ņâi zâk sâknam nâņgâmņâ bâliņâ kândâtkubap. ²Oi sâk sot ândiândiņ narâk ziap, zoren sâkkât âkņâle bâliņâ zo mân lumņâ Anutugât denâk lum ândibap.” ³Mârumņan itâ op ândiwe. Laņ ândiândiņ, âkņâle bâliņâ, too kâtik nem um gulip orot, nalem nemņik ândiândiņ, lopio sarâ kore okņaņgâwe. Zen kut ņâi ņâi zo um kâtik a zen sot op gawe. ⁴Oi narâk ziren um kâtik a zen sot laņ gulip mân ândimegât nâņgâne ņâi oi sâm bâliņ kwatziņgâme. ⁵Ņâran ko ândiândiņâ sot mumuņâ, neņgât den sâm kwâkâbapkât sâsâņâ, Anutu, zâkkât mâteņan pindiņsâm kin topziņ sâm muyagibi. ⁶Oi topņâ itâgât. Yesuņa a mumuņâ siņgi âlip dâzângoip, zen mârum hânân sâk sot ândim mumuņangât siņgi ândiwe. Ka Yesuņa moip, narâk zoren siņgi âlip dâzângoi um dâpziņ sumbemân zâim ândiândi kâtik ândibigât mâtâp âsageip.

Narâk pânkânok uapkât buku op berân miangânat.

⁷Hânân kut ņâi ņâigât narâkņâ âkâbam uap, zorat zen um hâlâlu sot um wâgân kin ninâugât bâbâlaņ upi. ⁸Oi umziņandâ gâsâyagom ândibi. Umziņâ zo nep zoren pane zei kâtigibi. Yatâ op ândine tosa birâbirâņ zengâren âsagibap. ⁹Zen âkonņâ buņâ, buku oraņgâm ândibi. ¹⁰Anutuņa zen siņgi âlipkât imbaņâ top top zen ziņgip, zo aņâ aņâ zemziņgap. Zo mulun mem ândim tânagom ândibi. ¹¹Ņâi zâk siņgi âlipkât minduminduyân den sâbap, zâk Kembugât den zorik sâbap. Ņâi zâk bukurâpņâ kore otziņgâbapkât sâm pindip, zâk nep zo tuum ândibap. Zo Anutuņa imbaņâ pindi tuubap. Zen yatâ utne Yesu Kristoņâ tânzângoi

ândimegât a zen Anutu mâpâsem sâm âlip kwâkņangâbi. Zâkkâren neule âsakņâ sot imbanâ zeipņâ zem zâimâmbap. Perâkņak.

Yesugât op sâknam nâņgâmņâ umâlep muyaginat.

¹²Bukurâpnâ, zengâren sâknam kârâņņoot muyagem ziap, zorat op mân pârâk pambi. Sâknam zo zen mâsikâziņgâbapkât âsagiap. ¹³Kristo sâknam nâņgip, zen yatik nâņgâm ândie. Oi bet zâkņâ neule âsakņoot muyagei zâk sot sâtâre patâ upi. ¹⁴Zen Kristogât a op ândiegât sâm bâliņ kwatziņgâne nâņgâne âlip upap. Wangât, neule âsakņâ mariņâ, Anutugât Kaapumņâ, zâk zen sot ge ândiap, zorat. ¹⁵Zengâren gâbâ a nâiņâ den ku mo kâmbu mo a ku mo zâizâiņ op sâi ko zorat hâuņâ sâknam mem aņun upap. ¹⁶Ka zengâren gâbâ nâi zâk Kristogât a op târârak ândiapkât kâmbam mo tâk namin pane zorat nâņgi aņunņoot mân upap. Buņâ. Zâk Kristo sâknam nâņgip yatik sâknam nâņgap, zorat Anutu sâtâre okņangâbap. ¹⁷Nâņgânek. Anutuņâ top lâkulâku nep zo arâpņâ nengâren topkwap tubapkât narâkņâ mâte uap. Nep zo nengâren topkwap tuum âimņâ siņgi âlip birâme, zengâren tuum dap otziņgâbap? ¹⁸Zorat Kembugât ekabân den nâi itâ ziap,

“Hâuņangât den sâsâņ narâkņan a târârak ziņ sumbemân bagibagiņâ, zo yâmbâtņâ oi ko bâliņ mâme sot siņgi âlip birâme, zen dap upi?”

¹⁹Zorat Anutuņâ nâņgi âlip oi sâknam kwâkņan zâibi, zen âlip orotņangât nep tuum ândim Kembuņâ tânzâņgobapkât um bâbâlaņ op mambât ândibi. Wangât, Kembugât den zo kâtigemap, zorat.

A sâtņâ ândiândigât den.

5 ¹Zengâren galem a ândie, zen nâ galem a bukuziņandâ den dâzâņgobâ. Kristoņâ sâknam nâņgip, zo sinnâ bonņandâ egâwan. Oi ândimņâ zâk sot neule âsakņâ mimbat, zorat op ko nâ den zi dâzâņgua nâņgânek. ²Galem a zen Anutugât râma kâmut zi galem otziņgâbigât sâm ziņgip. Zo um yâmbât buņâ, um bâbâlaņâk galem otziņgâbi. Nep yatâ zo tuum kât sikum mimiņangât buņâ, nep zorat umziņ kiri tuubi. ³Oi a kembu otziņgâm buņâ. Ziņâ râma kândom otziņgâm mâtâp âlipņâ zo tirâpžâņgobi. ⁴Yatâ op ândine ko gâtâm râma galem a patâņâ gam sâņgân neuleņoot, ziniņ kâtik zo ziņgi mem ândibi.

⁵A sâk wâgân ândime, zen yatik dâzâņgobâ. Zen a patâ zengât gigiņâ ândibi. Oi zen aksik patâ nepkât sâņgum, kutņâ um gigiņâ, zo lapņâ kore orâņgâm ândibi. Zen nâņge. Kembugât ekabân den nâi itâ ziap. “Anutu zâk a zâizâiņ kâbakņeziņgâmap. Ka a um gigiņâ ândime, zen tânzâņgomap.” ⁶Zorat op ko zen um gigiņ op ândim Anutu imbanâ mariņâ, zâkkâren pindiņsâm ândibi. Yatâ utne nâņgi narâk mâte oi zâkņâ tânzâņgobap. ⁷Kut nâi nâigât nâņgâ kwâkâ upme, zo Anutugât bikņan

pam birâbi. Zâk umŋâ zengâren kinzap. Zâkŋâ on galem otziŋgâmap. Zorat nânŋâ kwâkâ mân op ândibi.

Um wâgân ândibi.

⁸Zen um kendon ândim gasâziŋ kârâm ândibi. Kâsaziŋ Sataŋ, zâk zuu kâtik Laiŋ yatâ op ŋâi mo ŋâi zibâ sâm âi takâm, ga takâm obândimap. ⁹Oi zen Kembugâren nânŋâm pâlatâŋ kwâkŋaŋgâm kâtigem kin, Sataŋ zâk kânzâratŋaŋgâne âibap. Oi itâ nânŋâbi. Bukurâpziŋ hân dâp zengâren yatik sâknam sot mâsimâsikâ muyagem ziap. ¹⁰Oi Anutu, tânzâŋgozâŋgoŋ mariŋâ, zâk neule âsakŋâ zinzŋ kâtik zo zemŋaŋgap, zâkŋâ zen Kristo sot pâlatâŋ op ândiegât neule âsakŋan bagibigât diiziŋgiŋâ sâi narâk pânkânok sâknam nânŋânetâ ko melâŋ kubikziŋgâmŋâ mem kâtikŋan kwatziŋgâbap. ¹¹Yatâ mo yatâ tuubapkât imbaŋâ zo zâkkâren zeipŋâ zem zâimâmbap, kâtikŋâ. Zo perâkŋak.

Den murukŋâ.

¹²Nâ den zo Siliwano dukua ekabân kulemgum ziŋgap. Nâ zâkkât nânŋa buku bonŋâ uap. Zen um bâbâlaŋ op siŋgi âlip mem kâtigem ândibigât den pânkânok zi dâzâŋguan. Itâ nânŋâm ândibi. Siŋgi âlip nânŋâm ândiwe, zo Anutuŋâ tânzâŋgozâŋgoŋaŋgât den bonŋâ. Zorat zen zorat umŋan bagim kâtigem kinbi.

¹³Kembuŋâ gâsuziŋgiŋ, yatik Babilon kamânân ândie, zengâren kâmutŋâ gâsuziŋgi ândie. Oi zo ziŋ zengât nânŋe. Oi nannâ Mareko zâk ârândân. ¹⁴Zen buku buku op luyâŋgâbi.

Kristogât siŋgi ândie, zengâren um lumbe zimbap.
Zo yatik.